

六
經
同
卷



清刻龍藏佛說法變相圖

六經同卷

佛說賢者五福德經

天請問經

佛說護淨經

佛說木槵經

當七

佛說無上處經

盧至長者因緣經

佛說賢者五福德經

西晉河內沙門白澤祖譯

聞如是一時佛在舍衛國祇樹給孤獨園佛告諸比丘賢者說法時有五福德何謂爲五福德其所生則得長壽是爲一福德其人

所生即得大富饒財多寶是爲二福德其人所生即端正無比是爲三福德其人所生即名譽遠聞是爲四福德其人所生即聰明大智是爲五福德何因賢者說法得長壽用前世說法時上語亦善中語亦善下語亦善其義備足歸家無爲好殺之人聞法即止不殺用是故得長壽何因說法之人得大富饒財多寶用前世說法時上中下語其義備悉歸家無爲盜竊之人聞經即止不盜便能施與用是故得大富何因說法之人得端正無比用前世說法時上中下語其義備悉歸家無爲令聞法者和氣安之即顏色悅自生光澤用是故得端正何因說法之人得名譽遠聞用前世說法時上中下語其義備悉歸家無爲令聞法者敬佛教法敬比丘僧用是故得

名聞何因說法之人得聰明大智用前世說法時上中下語其義備悉歸家無爲令聞法者曉了妙慧用是故得聰明大智是爲五法說經者得教也諸比丘聞經歡喜前爲佛作禮

卷七

佛說賢者五福德經